

ODLUKA O VODOVODU I KANALIZACIJI

I OPĆE ODREDBE

Član 1

Ovom odlukom propisuju se uslovi za snabdijevanje potrošača vodom za piće i uređuju eksploatacija, održavanje i korištenje općinskog vodovoda i kanalizacije.

Pojašnjenje izraza u ovoj Odluci

Član 2

Općinskim vodovodom, u smislu Zakona o vodama Ze Do Kantona, smatraju se vodoprivredni objekti za snabdijevanje potrošača vodom za piće u naseljenim mjestima kojima su sjedišta općina i u čijem su vlasništvu (u daljem tekstu: vodovod).

Vodovodnim uređajima u smislu ove Odluke, smatraju se objekti za zahvatanje i prečišćavanje vode, crpna postrojenja, rezervoari, vodovodna mreža sa priključcima i vodomjerima zaključno sa glavnim šahtom, koji služi za snabdijevanje potrošača vodom iz vodovoda (u daljem tekstu: vodovodni uređaji).

Kanalizacijom, u smislu ove Odluke, smatraju se sistemi za prikupljanje i odvođenje otpadnih i atmosferskih voda čiji objekti i postrojenja čine jedinstvene konstruktivne i funkcionalne cjeline (u daljem tekstu: kanalizacija).

Kućnim vodovodnim i kanalizacionim uređajima i instalacijama, u smislu ove Odluke, smatraju se sve ostale vodovodne i kanalizacione naprave i uređaji kod potrošača iza glavnog vodomjera, odnosno sabirnog šahta, koji služi za snabdijevanje vodom potrošača iz vodovoda i odvođenje otpadnih voda (u daljem tekstu: kućni vodovodni i kanalizacioni uređaji i instalacije).

Potrošačima, u smislu ove Odluke, smatraju se pravna i fizička lica koja koriste vodu iz vodovoda i kanalizacione instalacije za odvođenje otpadnih voda (u daljem tekstu: potrošač).

Otpadnim vodama, u smislu ove Odluke, smatraju se: upotrebene fekalne vode, sanitarne otpadne vode domaćinstva, ugostiteljskih objekata, bolnica i sličnih objekata, drenažne vode groblja, sanitarnih deponija i sličnih objekata, industrijske otpadne vode zagađene upotrebom u tehnološkom procesu ili pranju površina na kojima se odvija tehnološki proces, (u daljem tekstu: otpadne vode).

Atmosferskim vodama, u smislu ove Odluke, smatraju se oborinske vode, površinske vode, podzemne vode, višak vode mješovitog sistema izdvojen preko kišnih preljeva, vode upotrebene za pranje javnih površina, vode koje nisu nastale kao posljedica tehnološkog procesa (vode iz bazena za plivanje, prelive i izlivi rezervoara čiste vode i sličnih objekata) u daljem tekstu: atmosferske vode.

Javnim preduzećem, u smislu ove Odluke, smatra se preduzeće kojem je osnivač povjerio i ustupio obavljanje djelatnosti snabdijevanja potrošača vodom, upravljanje i održavanje vodovodnih uređaja i kanalizacije i pružanje ostalih usluga potrošačima (u daljem tekstu: JKP).

Član 3

Vodovodnim uređajima i kanalizacijom iz člana 2. stav 1. i 2. ove Odluke upravlja i iste održava JKP.

JKP ujedno daje i prijedloge proširenja i povećanja kapaciteta vodovodnih uređaja i kanalizacije.

Kućne vodovodne i kanalizacione uređaje i instalacije iz člana 2. stava 3. ove Odluke održavaju potrošači (korisnici objekata i zemljišta na kojem se nalaze), ako njihovo održavanje nije povjereno JKP ili nekom drugom ovlaštenom preduzeću.

Član 4

Radovi na izgradnji, rekonstrukciji i sanaciji vodovodnih uređaja i kanalizacije vrši se na osnovu odobrenja izdatog od Općinske službe za prostorno uređenje i stambeno – komunalne poslove (u daljem tekstu: nadležna služba organa uprave).

Član 5

JKP vodi evidenciju vodovodnih uređaja i kanalizacije, i dužan je iste evidentirati u katastar podzemnih i nadzemnih instalacija i uređaja koje vodi Općinska služba za geodetske, imovinsko – pravne poslove i katastar nekretnina općine Visoko.

Svi privredni subjekti, kao i građani, dužni su JKP staviti na uvid sve podatke o vanjskoj vodovodnoj i kanalizacionoj mreži izgrađenoj u njihovom krugu, odnosno dvorištu.

Član 6

Voda iz vodovoda kojim upravlja JKP mora odgovarati sanitarno higijenskim propisima.
Za ispravnost kvaliteta vode odgovorno je JKP.

Član 7

U cilju omogućavanja neprekidnog i neometanog snabdijevanja potrošača dovoljnim količinama pitke vode i nesmetanog odvoda otpadnih voda JKP je dužan da:

1. Neprekidno održava u ispravnom stanju vodovodne uređaje i kanalizaciju
2. Stalno kontroliše i preduzima sve potrebne mjere higijenske ispravnosti vode u vodovodu,
3. Da vrši sve druge poslove iz svoje nadležnosti.

Član 8

Potrošači su obavezni plaćati naknadu za korištenje, na način utvrđen ovom Odlukom i općim aktima JKP-a kojima se uređuju odnosi i način vršenja ovih usluga.

Član 9

Ako je prekid snabdijevanja vodom prouzrokovan višom silom (elementarna nepogoda i slično), većim tehničkim smetnjama u mreži, prekidom snabdijevanja pogonskom energijom ili iz bilo kojih drugih opravdanih razloga, JKP je obavezno preduzeti sve potrebne mjere u cilju što bržeg otklanjanja nastalih smetnji i o smetnjama odmah obavijestiti nadležnu službu organa uprave i potrošače putem sredstava javnog informisanja.

Kada je prekid snabdijevanja potrošača vodom predvidiv (radovi na rekonstrukciji, veća opravka i slično), JKP je obavezno najmanje tri dana prije prekida na pogodan način obavijestiti potrošača. (javni oglas, sredstva javnog informisanja i slično).

Član 10

Sve vrste radova na vodovodnim uređajima i kanalizaciji izvodi JKP.

Izuzetno, JKP može odobriti potrošaču da u vlastitoj režiji izvede građevinski dio potrebnih radova, a da kontrolu, montažu i priključak izvrši JKP.

Član 11

Potrošači su dužni u svemu se pridržavati odredaba ove Odluke i svoje kućne i kanalizacione uređaje i instalacije održavati u ispravnom stanju, kako bi se spriječilo rasipanje vode i nastajanje drugih šteta.

Član 12

Zabranjeno je korištenje vodovodnih instalacija i uređaja kao uzemljenje za električna postrojenja i naprave.

II PRIKLJUČENJE OBJEKATA NA VODOVODNU I KANALIZACIONU MREŽU

Član 13

Svi građevinski objekti sagrađeni pored vodovodne i kanalizacione mreže moraju se, prije puštanja u upotrebu, spojiti sa vodovodnom, odnosno kanalizacionom mrežom.

Sistem odvođenja sa javnih površina priključuju se na javnu kanalizaciju kanalizacionim priključkom.

Član 14

Iznimno, objekti koji se ne mogu priključiti na javnu kanalizaciju (nema ulične kanalizacije, tehnički je nemoguće izvesti kanalski priključak i slično), a za koje je obezbjeđen priključak na vodovod, moraju biti priključeni na propisno izgrađenu septičku jamu, prema odobrenju za građenje nadležne službe organa uprave.

Član 15

U slučaju da se iz tehničkih razloga objekat ne može priključiti na glavnu vodovodnu i kanalizacionu mrežu preko zemljišta koje koristi posjednik, odnosno korisnik objekta nadležna služba organa uprave će rješenjem odrediti da se priključak izvede preko susjednog zemljišta.

Vlasnik, odnosno korisnik objekta, koji se priključuje na način iz stava 1 ovog člana, dužan je susjedno zemljište i druge u tu svrhu raskopane površine o svom trošku dovesti u prvobitno stanje, kao i nadoknaditi svu stvarnu štetu prouzrokovanu radovima.

Odredbe ovog člana odnose se i za slučaj kada se objekat priključuje posredno spajanjem na priključak susjednog objekta, s tim da se prethodno reguliše pitanje plaćanja srazmjernog dijela troškova izgradnje priključka susjednog objekta.

Imovinsko – pravne odnose sa vlasnicima susjednih zemljišta iz prethodnog stava, rješava nadležna služba organa uprave na zahtjev potrošača i korisnika.

Član 16

Za izvođenje radova na opravljaju vodovodne i kanalizacione mreže, JKP nije potrebna saglasnost, ali je o ovim radovima dužna prethodno obavijestiti potrošače i nadležnu službu organa uprave.

Kada se vrši zamjena ili izmještanje postojeće vodovodne i kanalizacione ulične mreže, objekti koji su bili priključeni na raniju mrežu, priključuju se na novoizgrađenu mrežu o trošku fizičkih i pravnih lica, po čijem se nalogu, odnosno na čije se potrebe vršila zamjena ili izmještanje.

Za slučaj iz stava 2 ovog člana nije potrebno posebno odobrenje za priključak.

Član 17

JKP je dužno podnosiocu zahtjeva uz propisanu naknadu, izdati:

1. Tehničke uvjete i podatke koji su potrebni za izradu projektne dokumentacije unutrašnjih instalacija vodovoda i kanalizacije, a koji sadrže:

- podatke o kapacitetu vodovoda i mogućnosti priključka objekta, s tim da se ne ugrozi normalno snabdijevanje vodom ostalih potrošača
- definiranje odvođenja otpadnih voda
- ostali tehnički uvjeti neophodni za projektiranje

2. Saglasnost za priključenje objekta na gradski vodovod i kanalizaciju, ukoliko je projektna dokumentacija urađena na osnovu datih tehničkih uvjeta, a koja je potrebna u postupku izdavanja odobrenja za građenje nadležne službe organa uprave.

Član 18

Objekat se može priključiti na vodovod, odnosno kanalizaciju, samo na osnovu odobrenja nadležne službe organa uprave, ako su ispunjeni propisani uvjeti iz odobrenja za građenje objekta.

Član 19

Priključak kućnih vodovodnih i kanalizacionih instalacija i uređaja za vodovodnu i kanalizacionu mrežu, vrši JKP, na pismeni zahtjev korisnika.

JKP je dužno izvršiti priključak ako su ispunjeni svi uslovi u pogledu izvedbe instalacija.

JKP je dužno izvršiti dovođenje u prvobitno stanje javnih površina po odredbama Odluke o komunalnom redu.

Član 20

U slučaju da JKP odbije da izvrši priključenje iz člana 19. ove Odluke, nadležna služba organa uprave, na pismeni zahtjev tražioca priključka ili po vlastitoj inicijativi obrazuje stručnu komisiju od najmanje tri člana, u koju obavezno ulazi predstavnik JKP koji ispituje opravdanost odbijanja, te daje svoje stručno mišljenje.

Član 21

Snabdijevanje vodom iz vodovoda gdje nema kanalizacione mreže može se dozvoliti samo pod uvjetom da je prethodno obezbjeđen odvod otpadnih voda.

Budući potrošač mora imati izgrađenu vodonepropusnu septičku jamu po važećim propisima, a prema uvjetima koji koje u odobrenju za građenje odredi nadležna služba organa uprave.

Septičke jame ne smiju imati nikakve prelive, kojima bi se sadržaj razlijevao na okolnu površinu ili vodotok.

Član 22

Zabranjeno je samovoljno priključivanje na vodovodnu i kanalizacionu mrežu.

Ako se takav priključak izvede, JKP će priključiti na trošak samovoljnog potrošača i prijaviti ga nadležnoj službi organa uprave za vođenje prekršajnog postupka.

Član 23

Svaki kvar ili štetu na vodovodnom, kanalizacionom priključku i vodomjeru, potrošač je dužan odmah prijaviti JKP, koje je dužno hitno poduzeti sve potrebne mjere radi otklanjanja kvara.

Član 24

Oštećenja i smetnje na vodovodnom i kanalizacionom priključku nastala krivicom ili nepažnjom potrošača, JKP sanira o trošku potrošača.

U spornim slučajevima iz stava 1. ovog člana o plaćanju troškova, nadležan je Općinski sud u Visokom.

Spor ne odlaže izvršenje odluke.

Član 25

Sve dovode i odvode na priključne vodove, bez obzira o čijem su trošku izvedeni, JKP je obavezno održavati, o svom trošku.

III VODOMJER, POTROŠNJA, PLAĆANJE

Član 26

Potrošnja vode se mjeri vodomjerom.

U slučaju da je vodomjer privremeno van upotrebe (kvar) potrošnja vode se obračunava paušalno, na osnovu prosječne potrošnje vode u prethodna tri mjeseca.

Potrošnja vode čitavog objekta mjeri se jednim vodomjerom na priključku objekta, s tim da se za jedan objekat mogu ugraditi dva ili više vodomjera, za potrošače koji plaćaju različite cijene za korištenje vode.

Član 27

U postojećim stambenim objektima, sa više odvojenih stubišta, za svaku stambenu jedinicu, potrebno je ugraditi vodomjer u roku od 5 godina od dana stupanja na snagu ove Odluke, a o trošku vlasnika stambene jedinice. Prilikom izgradnje novih kolektivnih stambenih jedinica obavezno je za svaki stan ugraditi vodomjer. Poslovni prostori moraju posjedovati zaseban vodomjer a mjesto postavljanja određiće se uz saglasnost JKP.

Član 28

Dok se ne obezbjede tehnički uslovi za mjerenje potrošnje vode, za poslovne prostore, posebno za svakog potrošača, mjerenje potrošnje vode vršit će se zajednički za svaki objekat na način propisan odredbama ove Odluke. Raspodjela potrošnje vršiće se prema važećim normativima za tu vrstu djelatnosti koja se obavlja u određenom poslovnom prostoru.

Svi potrošači iz stava 1 ovog člana dužni su najdalje u roku od 2 godine od stupanja na snagu ove Odluke izvršiti odvajanje svog priključka i izvršiti postavljanje zasebnog vodomjera, o svom trošku, a radove izvodi JKP.

Član 29

Ugradnja vodomjera se po pravilu vrši neposredno iza regulacione linije ili na drugom pogodnom mjestu.

U saglasnosti za priključenje JKP, odredit će se tip šahta za vodomjere. Vodomjer mora biti smješten u posebnom šahtu izgrađenom po određenom tipu i po upustvima JKP.

Postojeći šahtovi za vodomjere koji se nalaze unutar objekta moraju se izmjestiti van objekta u roku od dvije godine, o trošku potrošača.

Član 30

Šaht za smještaj vodomjera mora biti prekriven poklopcem, izrađenim od livenog željeza ili čeličnog lima, obezbijeđenim od nasilnog otvaranja.

Član 31

Šaht izgrađen prije stupanja na snagu odredaba ove Odluke, u kome je otežan rad oko održavanja i očitavanja vodomjera, potrošač je dužan prilagoditi određenom tipu, najkasnije u roku od jedne godine, računajući od dana prijema pismenog zahtjeva JKP-a.

U slučaju da zbog neodržavanja šahta u ispravnom stanju, prijeti opasnost od zagađivanja vode, JKP može obustaviti snabdijevanje vodom dok se šaht ne osposobi.

Član 32

Ugradnju i zamjenu vodomjera na vodovodu vrši JKP.

Kontrolu održavanja i baždarenja vodomjera na propisan način vrši JKP.

Ako je do oštećenja došlo krivicom ili nepažnjom potrošača, opravka vodomjera vrši se na njegov trošak.

Član 33

Obračunavanje potrošnje vode neće se vršiti na osnovu pokazivanja vodomjera koji nije pregledala služba određena za kontrolu vodomjera i na kojem nema plombe, kao dokaz baždarenja.

Član 34

Potrošnja vode utvrđuje se prema razlici stanja brojila vodomjera na kraju i početku obračunskog razdoblja, time da se čitaju samo cijeli kubni metri utrošene vode.

Član 35

Potrošač ima pravo pismeno zatražiti od JKP da se provjeri ispravnost vodomjera i tačnost očitavanja. Na zahtjev iz stava 1. ovog člana JKP je obavezno u roku od pet dana izvaditi vodomjer i dostaviti na kontrolu. Smatra se da vodomjer radi ispravno ako mu odstupanja mjerenja potrošnje vode nisu veća od +/- 2%.

Član 36

U slučaju odstupanja većih od +/- 2% vrši se ispravljanje zaračunatog iznosa za vodu prema visini ustanovljenog odstupanja u korist potrošača.

Za obračun se uzima najveće odstupanje između donje i gornje granice tačnosti pokazivanja, a obračunati iznos se može ispraviti samo za vrijeme u kojem je vodomjer neispravno pokazivao i to srazmjerno prema evidentiranoj potrošnji, ali najviše za 90 dana.

Način obračuna iz stava 2. ovog člana, primjenjuje se i kada se vremensko razdoblje neispravnog pokazivanja potrošnje ne može tačno utvrditi.

Osnova za procjenu je srednja potrošnja u posljednja tri mjeseca kada je vodomjer ispravno pokazivao potrošnju vode. Nakon provjere ispravnosti vodomjera, ako se ustanovi da je vodomjer ispravan, troškove provjere snosi podnosilac zahtjeva, a u suprotnom JKP.

Član 37

Potrošnja vode na javnim površinama (pranje ulica, parkova, javne fontane i slično), obračunava se na način utvrđen pismenim ugovorom između JKP i potrošača, a na osnovu stanja brojila na početku i na kraju mjeseca u tekućoj godini.

Za gradilišta korištenje vode i kanalizacije obračunava se po stvarnoj potrošnji.

Član 38

Očitavanje brojila na vodomjeru vrši se svakog mjeseca.

Očitavanje brojila na vodomjeru vrše ovlašteni radnici JKP, koji su na zahtjev potrošača dužni pokazati pismeno ovlaštenje.

Stanje brojila na vodomjeru očitava se po rasporedu koji određuje JKP.

Član 39

Potrošač je dužan omogućiti očitavanje vodomjera. Ako krivicom potrošača ovlašteno lice JKP nije moglo izvršiti očitavanje vodomjera, potrošnja vode za taj mjesec određuje se procjenom na osnovu prosječne potrošnje u posljednja tri mjeseca.

Član 40

Potrošač je dužan plaćati naknadu za utrošenu vodu i kanalizaciju, sve dok JKP ne podnese pismenu objavu. Objava može biti trajna i privremena.

Privremena objava ne može biti na kraći period od 6 mjeseci. Ako se potrošač želi ponovo priključiti na vodovodnu mrežu, dužan je uplatiti paušalni iznos (za ponovnu prijavu), na osnovu cjenovnika usluga JKP.

Promjena vlasnika objekta ili stana, odnosno potrošača, prijavljuje se u JKP-u u pismenoj formi u roku od 8 dana.

Član 41

U slučaju privremene objave potrošnje vode zatvara se ulični ventil, a kod trajne objave sklanja se vodomjer. Troškove zatvaranja ventila, demontaža i ponovna ugradnja vodomjera i otvaranje ventila snosi potrošač.

Član 42

Za utrošenu vodu iz vodovodne mreže i za korištenje kanalizacione mreže, potrošač plaća naknadu po cijenama koje na prijedlog JKP i nadležne službe organa uprave usvaja Općinsko vijeće.

U cijenu se uračunavaju troškovi eksploatacije i tekućeg održavanja vodovodne i kanalizacione mreže.

Član 43

Potrošači plaćaju uz obračun za utrošenu vodu i naknadu za korištenje kanalizacione mreže svakog mjeseca.

Član 44

Potrošači – domaćinstva, kod kojih se potrošnja nemože mjeriti posebnim vodomjerom za za svakog potrošača, plaćaju utrošenu vodu i korištenje kanalizacione mreže prema broju članova domaćinstva (kolektivni stanovanje).

Član 45

Potrošači iz člana 43. ove Odluke plaćaju naknadu za korištenje kanalizacione mreže po kubnom metru utrošene vode, u postotku koji bude utvrđen prema važećem cjenovniku komunalnih usluga.

Član 46

Reklamacije na obračun potrošnje vode i korištenja kanalizacione mreže, potrošači podnose JKP pismenim putem u roku od 10 dana po prijemu obračuna ili od prijema računa u slučajevima iz člana 45. ove Odluke.

Ukoliko se reklamacija odbije, JKP je dužno pismeno odgovoriti, uz obrazloženje zbog odbijanja reklamacije u roku od 15 dana.

Ukoliko je reklamacija opravdana, ista će se uvažiti kroz naredni račun za komunalne usluge.

IV JAVNI IZLJEVI I HIDRANTI

Član 47

Javni izljevi su vodoskoci, česme, hidranti i slično.

Vodni objekti iz stava 1. ovog člana, mogu se graditi samo u detaljnim dokumentima prostornog uređenja i Programa uređenja javnih površina, kao i na zahtjev investitora reprezentativnog objekta, ako su obuhvaćeni projektom vanjskog uređenja istog.

Troškove postavljanja, izljeva i utrošene vode iz vodovoda JKP naplaćuje od tražioca postavljanja izljeva.

Član 48

Iz javnih hidranata vodu mogu uzimati vatrogasne jedinice i drugi objekti uz saglasnost JKP. Voda se može uzimati samo sa određenih hidranata ispred kojih su ugrađeni vodomjeri i ispunjeni uvjeti sanitarne bezbjednosti vode.

V ZAŠTITNE MJERE

Član 49

Zabranjuje se izvođenje priključaka na priključnom vodu ispred vodomjera ili između uličnog voda i vodomjera.

Izuzetno, može se dozvoliti izrada takvog priključka zbog priključenja susjednog objekta. Ovakav priključak JKP izvodi na isti način i uz iste uslove kao i priključni vod.

Član 50

Investitor ili korisnik novoizgrađenog ili rekonstruisanog objekta je dužan prije priključenja objekta na vodovodnu i kanalizacionu mrežu pribaviti zapisnik o ispitivanju ispravnosti kućnih vodovodnih i kanalizacionih instalacija.

Investitor ili korisnik objekta je dužan prije priključenja objekta na vodovodnu mrežu izvršiti dezinfekciju internih instalacija vodovoda, o čemu potvrdu izdaje JKP ili za to ovlašteno preduzeće.

Član 51

JKP je dužno prije priključenja objekta na vodovodnu mrežu izvršiti dezinfekciju kućnih vodovodnih instalacija o trošku investitora ili vlasnika objekta ako to nije učinjeno kako je navedeno u članu 50. stav 2.

Član 52

JKP ima isključivo pravo otvaranja i zatvaranja ventila. Potrošač može zatvoriti ventil iza vodomjera u slučaju kvara ili popravke na kućnoj vodovodnoj instalaciji.

Zatvaranje ventila ispred vodomjera potrošač može izvršiti samo u slučaju kvara vodomjera, ali o tome je najkasnije u roku od 24 sata dužan obavijestiti JKP.

Član 53

Potrošač se mora brinuti da se kućne vodovodne i kanalizacione instalacije zaštite od oštećenja i kvarova i da uvijek budu spremne za trajno služenje njihovoj namjeni. Takođe je dužan blagovremeno poduzeti sve potrebne mjere da se vodovodna i kanalizaciona instalacija na njihovoj nekretnini zaštiti od smrzavanja.

Član 54

U cilju omogućavanja kontrole vodovodne i kanalizacione mreže i instalacija radnicima JKP koji imaju pismeno ovlaštenje, mora se omogućiti slobodan pristup na sve dijelove nekretnina i u sve objekte u kojima su postavljene vodovodne i kanalizacione instalacije preko kojih se vrši snabdijevanje vodom, odnosno odvodnje otpadnih voda.

Član 55

U kanalizacionu mrežu zabranjuje se ispuštati ili ubacivati:

1. smeće, pepeo, gips, pijesak, trosku, cement i druge opasne otpadne materije koje mogu oštetiti kanalizacionu mrežu i ugroziti njeno funkcionisanje.
2. materije i predmete koji bi mogli da štete javnoj kanalizaciji, radnicima koji u njoj rade, vodotokovima rijeka i potocima.
3. otpadne vode koje sadrže kiseline, alkalije, razne soli, tečna goriva, ulja i maziva, masti i krv, te vode koje sadrže materije takve prirode da bi mogle štetno uticati na kanalizacionu mrežu.

JKP može u izuzetnim slučajevima, na naročiti pripremljenim mjestima odobriti ubacivanje snijega i leda u kanalizaciju. Smeće i drugi otpaci skupljeni čišćenjem ulica, trgova, pijaca i drugih javnih površina, takođe se ne smiju ubacivati u slivnike i kanalizacionu mrežu.

Član 56

Voda i sve druge tečnosti koje imaju temperaturu veću od 35° C, ili koje sadrže škodljive kiseline, alkalije i sl. ne smiju se ispuštati u kanalizacionu mrežu, a vode od kondenzacija i vode korištene za rashlađivanje parnih kotlova i iz zanatskih i industrijskih radionica mogu se ispuštati u kanalizacionu mrežu samo ako zadovolje posebne propise u zaštiti voda.

Član 57

Vlasnici septičkih jama dužni su na vrijeme zatražiti čišćenje (pražnjenje) kako ne bi došlo do preljevanja, a time i zagađivanja okoline.

Čišćenje (pražnjenje) septičkih jama vrši se odmah po njenom punjenju, a najmanje jedan put godišnje.

Član 58

Odvoz fekalija vrši se specijalnim vozilima iz kojih se fekalije ne mogu prosipati.

Fekalije se istresaju u gradsku kanalizaciju, na mjestima koje odredi JKP.

Član 59

Čišćenje septičkih jama obavlja JKP, odnosno pravno i fizičko lice kome se povjere ovi poslovi, u skladu sa sanitarno – tehničkim uslovima, a na zahtjev vlasnika septičke jame.

Visina naknade za pražnjenje septičkih jama i odvoz fekalija određuje JKP ili pravno ili fizičko lice kome je povjereno vršenje ovih poslova.

VI ŠTEDNJA VODE

Član 60

Vlasnici ili korisnici stambenih ili poslovnih objekata su dužni preduzimati sve moguće mjere za sprečavanje, rasipanje i gubitak vode u vodovodnoj mreži. U tom cilju preduzeća koja se bave održavanjem unutrašnjih vodovodnih i kanizacionih instalacija, ovlaštena su da uz saglasnost sa potrošačima (etažni vlasnici), vrše i pregled kućnih vodovodnih instalacija i uređaja, te potrošačima predlaže otklanjanje nađenih nedostataka, odnosno nalogati popravku kvarova.

Ako potrošač ni poslije ponovljenog naloga ne izvrši popravak istog kvara, JKP će podnijeti prijavu nadležnoj službi organa uprave.

Član 61

U slučaju veće nestašice vode zbog suše ili iz bilo kojih drugih opravdanih razloga, JKP može uz saglasnost Općinskog načelnika donijeti plan ograničenja potrošnje vode u određene svrhe.

U slučaju veoma teške nestašice vode, naročito poslije elementarnih nepogoda, na prijedlog JKP i nadležne službe organa uprave, Općinsko vijeće će donijeti Odluku o ograničenoj potrošnji vode, kontroli i mjerama za provođenje Odluke.

Član 62

Ograničenje potrošnje vode iz člana 61. ove Odluke ne odnosi se na vatrogasnu službu u slučaju gašenja požara i objekte JU Dom zdravlja sa poliklinikom Visoko

VII OBUSTAVA SNABDIJEVANJA POTROŠAČA VODOM

Član 63

JKP ima pravo obustaviti snabdijevanje potrošača vodom na vodovodnom priključku u sljedećim uslovima:

1. Kada potrošač otkáže potrošnju vode;
2. Kada se dosadašnja potrošnja odjavi, a nova još ne prijavi;
3. Kada se vrši otklanjanje smetnji kvarova na internoj vodovodnoj i kanizacionoj instalaciji, ili na vodovodnoj, odnosno kanizacionoj mreži;
4. Kada stanje internih vodovodnih instalacija i uređaja ugrožava zdravlje korisnika zbog kvaliteta vode u vodovodnoj mreži;
5. Kada je šaht za smještaj vodomjera krivicom ili iz nehata potrošača zagađen, zatvoren ili nepristupačan, a potrošač ni poslije pismene opomene, nije preduzeo nužne mjere da se stanje popravi;
6. Kada potrošač krši propise i naredbe o štednji vode ako je štednja određena;
7. Kada potrošač neplati račun za potrošnju vode i korištenje kanizacione mreže u roku propisanom odredbama ove Odluke ili odbije da primi račun za utrošenu vodu i korištenje kanizacione mreže;
8. Kada potrošač priključi nove interne vodovodne i kanizacione instalacije ili izvrši rekonstrukciju postojećih, ili ako dozvoli da se na njegov priključak priključi drugi objekat, a za radove i postupke nema pismeno odobrenje JKP;
9. Ako potrošač namjerno pokvari vodomjer;
10. Ako ne omogući službenom licu pristup za očitavanje vodomjera.

U slučajevima iz stava 1. ovog člana, snabdijevanje potrošača vodom je obustavljeno, sve dok se ne otklone uzroci zbog kojih je izvršena obustava, s tim da troškovi obustavljanja snabdijevanja i ponovnog snabdijevanja padaju na teret potrošača.

VIII NADZOR

Član 64

Nadzor nad provođenjem odredaba ove Odluke vrše nadležni organi za poslove sanitarne, komunalne i urbanističke građevinske inspekcije općine Visoko.

IX KAZNE NE ODREDBE

Član 65

Novčanom kaznom od 300,00 do 3.000,00 konvertibilnih maraka, kazniće se za prekršaj JKP i druga pravna lica:

1. Ako neprekidno ne održava u ispranom stanju vodovodne i kanalizacione uređaje (član 7. tačka 1.)
2. Ako ne kontroliše i ne preduzima potrebne mjere za higijensku ispravnost vode (član 7. tačka 3.)
3. Ako odmah ne preduzme mjere za što brže otklanjanje smetnje koje su uzrokovale prekid snabdijevanja ili o smetnjama ne obavijesti potrošače (član 9)
4. Ako ne obavijesti potrošača i komunalnu inspekciju o izvođenju radove (član 16.)
5. Ako raskopane javne površine ne dovede u prvobitno stanje (član 19. stav 3.)
6. Ako dozvoli snabdijevanje vodom iz vodovoda na području gdje nema kanalizacione mreže, ako podnosilac zahtjeva prethodno nije izgradio septičku jamu (član 21.)
7. Ako ne preduzme potrebne mjere za otklanjanje kvarova na priključku i vodomjeru (član 23.)
8. Ako o svom trošku ne održava dovode, odvode i vodomjere (član 25.)
9. Ako na zahtjev potrošača ne provjeri ispravnost vodomjera (član 35. stav 2)
10. Ako ne izvrši dezinfekciju kućnih vodovodnih instalacija, pošto je vlasnik ili korisnik objekta izvršio uplatu na račun JKP (član 50.)
11. Ako ispušta u kanalizaciju zabranjene materije (član 55)
12. Ako ne izvrši čišćenje septičke jame, po uplati određene sume vlasnika septičke jame (član 59.)

Za prekršaj iz stava 1 ovog člana kazniće se i odgovorno lice iz JKP i drugom pravnom licu novčanom kaznom do 800,00 konvertibilnih maraka.

Član 66

Novčanom kaznom od 50,00 do 3.000,00 konvertibilnih maraka kazniće se za prekršaj pravno lice ili imaoci radnje koji vrše samostalnu djelatnost ličnim radom;

1. Ako objekat ili građevinsku parcelu ne spoji sa vodovodom, odnosno kanalizacionom mrežom (član 13.)
2. Ako za poslovni prostor ne obezbijedi zaseban vodomjer (član 27. stav 3. i član 28. stav 2.)
3. Ako ne pribavi zapisnik o ispravnosti kućnih vodovodnih i kanalizacionih instalacija (član 50.)
4. Ako prije puštanja u eksploataciju objekta ne izvrše dezinfekciju kućnih instalacija i dovode interne vodovodne mreže (član 51.)

Za prekršaj utvrđen u članu 66 kazniće se i odgovorno lice novčanom kaznom do 800,00 konvertibilnih maraka.

Član 67.

Novčanom kaznom od 10,00 do 300,00 konvertibilnih maraka, kazniće se za prekršaj pojedinac:

1. Koji vodovodne instalacije i uređaje koristi kao uzemljenje za električna postrojenja i naprave (član 12.);
2. Ako odmah ne prijavi JKP kvar ili štetu na vodovodnom i kanalizacionom priključku ili vodomjeru (člana 11. i člana 23.);
3. Koji šaht za smještaj vodomjera ne snabdije sa propisanim poklopcem (član 30.);
4. Ako neovlašteno koristi vodu sa javnih izljeva ili hidranata (član 48.);
5. Koji o zatvaranju ventila ne obavijesti JKP u toku od 24 sata (član 52. stav 3.)

6. Ako na vrijeme ne izvrši čišćenje (pražnjenje) septičke jame (član 57.);

Ako je potrošač pravno lice iz stava 1. ovog člana kazniće se kaznom od 10,00 do 300,00 konvertibilnih maraka, a odgovorno lice do 500,00 konvertibilnih maraka.

Član 68.

Novčanom kaznom od 10,00 do 300,00 konvertibilnih maraka kazniće se za prekršaj pojedinac:

1. Ako ne izgradi sepričku jamu u roku (član 14.);
2. Koji samovoljno vrši priključenje na vodovodnu, odnosno kanalizacionu mrežu ili ih rekonstruiše (član 22.);
3. Koji ne prilagodi svoj šaht za vodomjer (član 31 i 33.);
4. Ako neplati naknadu za utrošenu vodu (član 43.);
5. Koji izvode priključak na priključnom vodu ispred vodomjera ili između uličnog voda i vodomjera (član 49. stav 1.);
6. Koji ne brine o ispravnosti kućnih vodovodnih i kanalizacionih instalacija i ne obezbijedi ih od oštećenja i smrzavanja (član 53.)
7. Koji onemogućava kontrolu vodomjera , vodovodne i kanalizacione mreže radnicima JKP (član 54);
8. Koji u kanalizacionu mrežu ispušta, odnosno ubacuje zabranjene stvari (član 55.)
9. Koji u kanalizacionu mrežu ispušta vodu i druge tečnosti preko dozvoljene toplote i zapaljive štetne materije (član 56);
10. Koji ne izvrši naložene opravke vodovodnih instalacija za sprečavanje rasipanja vode (član 60.)
11. Koji se ne pridržava plana ograničenja potrošnje vode (član 61.).

Ako je potrošač, odnosno investitor pravno lice, za prekršaj iz stava 1. ovog člana kazniće se kaznom od 300,00 do 2.000,00 konvertibilnih maraka, a odgovorno lice novčanom kaznom do 500,00 konvertibilnih maraka.

X ZAVRŠNE ODREDBE

Član 69.

Stupanjem na snagu ove Odluke prestaje da važi Odluka o vodovodu i kanalizaciji „Službeni glasnik općine Visoko“ broj 11/86).

Član 70

Ova Odluka stupa na snagu osmog dana od dana objavljivanja u „Službenom glasniku općine Visoko“

Broj: 01/2-02-167/03

Datum: 05.07.2003. godine

Visoko

Predsjedavajući

Općinskog vijeća Visoko

Džemail Silajdžić, s.r.